

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 16, No. 701

原始資料: 蕭鎮國大德提供, 維習安大德提供之高麗藏 CD 經文, 維習安大德提供, 北美某大德提供, 三寶弟子提供新式標點

## No. 701

### 佛說溫室洗浴眾僧經

後漢安息三藏安世高譯

阿難曰：「吾從佛聞如是：

「一時佛在摩竭國因沙崛山中，王舍城內。有大長者奈女之子，名曰耆域，為大醫王，療治眾病——少小好學，才藝過通；智達五經、天文地理——其所治者，莫不除愈；死者更生，喪車得還。其德甚多，不可具陳；八國宗仰，見者歡喜。

「於是耆域夜歎生念：『明至佛所，當問我疑。』晨旦，勅家大小眷屬，嚴至佛所。到精舍門，見佛炳然，光照天地。眾坐四輩，數千萬人，佛為說法，一心靜聽。耆域、眷屬下車直進，為佛作禮，各坐一面。

「佛慰勞曰：『善來，醫王！欲有所問，莫得疑難！』

「耆域長跪白佛言：『雖得生世，為人疎野，隨俗眾流，未曾為福。今欲請佛及諸眾僧、菩薩大士，入溫室洗浴。願令眾生長夜清淨，穢垢消除，不遭眾患。唯佛聖旨，不忽所願！』

「佛告醫王：『善哉，妙意！治眾人病，皆蒙除愈，遠近慶賴，莫不歡喜。今復請佛及諸眾僧，入溫室洗浴，願及十方眾藥療病，洗浴除垢，其福無量。一心諦聽，吾當為汝先說洗浴眾僧反報之福！』

「佛告耆域：『洗浴之法，當用七物，除去七病，得七福報。何謂七物？一者、然火；二者、淨水；三者、澡豆；四者、蘇膏；五者、淳灰；六者、楊枝；七者、內衣。此是洗浴之法。何謂除去七病？一者、四大安隱；二者、除風病；三者、除濕痺；四者、除寒水；五者、除熱氣；六者、除垢穢；七者、身體輕便，眼目精明。是為除去眾僧七病。如是供養，便得七福。何謂七福？一者、四大無病，所生常安，勇武丁健，眾所敬仰；二者、所生清淨，面目端正，塵水不著，為人所敬；三者、身體常香，衣服潔淨，見者歡喜，莫不恭敬；四者、肌體濡澤，威光德大，莫不敬歎，獨步無雙；五者、多饒人從，拂拭塵垢，自然受福，常識宿命；六者、口齒香好，方白齊平，所說教令，莫不肅用；七者、所生之處，自然衣裳，光飾珍寶，見者悚息。』

「佛告耆域：『作此洗浴眾僧、開士，七福如是。從此因緣，或為人臣、或為帝王，或為日、月四天神王，或為帝釋、轉輪聖王，或生梵天，受福難量；或為菩薩，發意持地，功成志就，遂致作佛。斯之因緣，供養眾僧，無量福田，旱澇不傷。』

「於是世尊重為耆域而作頌曰：

「『觀諸三界中， 天人受景福，  
道德無限量， 諦聽次說之。  
夫人生處世， 端正人所敬，  
體性常清淨， 斯由洗眾僧。  
若為大臣子， 財富常吉安，  
勇健中賢良， 出入無罣礙，  
所說人奉用， 身體常香潔，  
端正色從容， 斯由洗眾僧。  
若生天王家， 生即常潔淨，  
洗浴以香湯， 苾芴以熏身，  
形體與眾異， 見者莫不欣，  
斯造溫室浴， 洗僧之福報。  
第一四天王， 典領四方域，  
光明身端正， 威德護四鎮，  
日月及星宿， 光照除陰冥，  
斯由洗眾僧， 福報如影響。  
第二忉利天， 帝釋名曰因，  
六重之寶城， 七寶為宮殿，  
勇猛天中尊， 端正壽延長，  
斯由洗眾僧， 其報無等倫。  
世間轉輪王， 七寶導在前，  
周行四海外， 兵馬八萬四，  
明寶照晝夜， 玉女隨時供，  
端正身香潔， 斯由洗眾僧。  
第六化應天， 欲界中獨尊，  
天相光影足， 威靈震六天，  
自然食甘露， 妓女常在邊，  
眾德難稱譽， 斯由洗眾僧。  
梵魔三鉢天， 淨居修自然，  
行淨無垢穢， 又無女人形，  
梵行修潔己， 志淳在泥洹，  
得生彼天中， 斯由洗眾僧。  
佛為三界尊， 修道甚苦勤，

積行無數劫，    今乃得道真，  
金體玉為瓔，    塵垢不著身，  
圓光相具足，    斯由洗眾僧。  
諸佛從行得，    種種不勞勤，  
所施三界人，    無所不周遍，  
眾僧之聖尊，    四道良福田，  
道德從中出，    是行最妙真。』

「佛說偈已，重告耆域：『觀彼三界，人天品類，高下長短，福德多少，皆由先世用心不等，是以所受各異，不同如此；受諸福報，皆由洗浴聖眾得之耳！』」

佛說經已，阿難白佛言：「當何名此經？以何勸誨之？」

佛告阿難：「此經名曰“溫室洗浴眾僧經”。諸佛所說，非我獨造；行者得度，非神授與。求清淨福，自當奉行。」

佛說是經竟，耆域、眷屬聞經歡喜，皆得須陀洹道，禮佛求退，嚴辦洗具。眾坐大小，各得道迹，皆共稽首，禮佛而去。

### 佛說溫室洗浴眾僧經